

## Siunnersuummut nassuiaatit

### **Nassuiaatit nalinginnaasut**

#### **1. Aallarniut**

2024-imi Inatsisartut ukiakkut ataatsimiinnissaanni inatsisissatut siunnersuummik saqqummiussinissaq eqqarsaatigalugu, nunanit allanit ilisimaneqartumik unnuinermi akitsuummik pilersitsinissamat periarfissaq misissuiffigineqassasoq 2024-mut aningaasanut inatsit pillugu isumaqatigiissummut peqataasut isumaqatigiissutigaa. Taamaammat unnuinermi akitsuummik nutaamik, unnuinermi ataatsimi inummut ataatsimut 30 kr.-mik atuutilersitsisoqarnissaa siunnersuutigineqarpoq. Takornarianut unnuinermi akitsuut atuutissaaq, maanili najugalinnut atuunnani.

Najukkami aamma nunap immikkoortuani takornariartitsisarnerup inerisarnissaanut kommunit periarfissaat tapersersornissaat akitsuut atorlugu siunertaavoq. Ukiup ingerlanerani unnuinerit akitsuuserneqartussat amerlassusii malillugit akitsuummit iluanaarut kommunit akornanni agguataarneqassaaq. Akitsuummit isertitat assersuutigalugu suliassaqarfimmi, takornarniat amerleriarnersa sunnersimasaanni suliniutinut pinaveersaartitsisunut imaluunniit kommunimi takornariartitsisarnerup inerisarneqarnerata siuarsarnissaanut suliniutinut kommunit atorsinnaavaat.

#### **2. Siunnersuummi immikkoortut pingaarnertit**

Unnuinermi akitsuut tassaavoq akitsuut nutaaq nunatsinni siusinnerusukkut atorneqarsimangitsoq. Unnuinermi akitsuut nunanit allaniit ilisimaneqarpoq, assersuutigalugu takornariartorpassuaqartartuni illoqarfinni anginerusuni. Inuup ataatsip ataasiarluni unnuinerani unnuinermi akitsuummik 30 koruuniusussatut siunnersuutigineqartumik atuilersitsinikkut, Kalaallit Nunaat nunat allat qaffasissuserisaannut inississaaq.

Angalasunut nunani allani najugaqartunut akiligassiissutaasassaaq Kalaallit Nunaannili najugaqartunut atuunnani. Tamatuma unnuisarfiit unnuisut najugaqarnermut uppersaataannik assingusumilluunniit qinnuiginnittarnerannik kinguneqassaaq, tamanna allaffissornikkut suliaqarnerunermik kinguneqassaaq. Tamanna, hotelit unnuisarfiillu allat Naatsorsueqqissaartarfimmut unnuisut inuiaassusii maannakkut nalunaarsulereertarneri, kiisalu nunaqatavut akitsuuserneqarnerunnginnissaannik patsiseqarpoq.

Akitsuutip kingunerisaattut allaffissornikkut suliat annikillisarnerlugit angalasut sunngiffimmut inuussutissarsiornermulluunniit atasumik imaluunniit taakku akuleriillugit siunertaqarnerat pillugu assigiinngisitsisoqanngilaq. Immikkoortitsinerit taama ittut

angalasunut, akitsuummik akiliisussaatitaasunut aamma nakkutilliinermik oqartussaasunut unammilligassanik amerlisaasinnaapput, pingaartumik pisut ilaanni inuussutissarsiornermut atasumik atanngitsumilluunniit siunertaqarnersut taamaassimappallu qanoq annertutigisumik, angalaneq siunertaqarnersoq uppernarsaaffigissallugu ajornakusoorsinnaavoq.

Taamaattumik akitsuutip qaffasissusissaatut siunnersuutigineqartup aamma inatsisip atuuffissaata annertussusia takutippaa. Tamatuma saniatigut angalasarnernut atatillugu siusinnerusukkulli Kalaallit Nunaata qaffasissunik aningaasartuuteqarfiusartutut isumaqarfigineqareenera pingaarutilittut aallaavigineqarsimavoq.

Nunami maani akissarsissutigalugu unnuiffissamik tunniussisoq tassaavoq akitsuummik akileeqquneqarsinnaasoq. Akitsuuserneqartussaataasut amerlavallaarnissaat pinngitsoortinniarlugu, qaqugukkut attartortitsisup inatsimmut ilaatinneqarneranut minnerpaaffiliisoqarpoq. Taamaamat attartortitsisartut mikinerusut eqqarsaatigalugit allaffissornerullu annertussusianik killiliumalluni, akitsuuserneqartussaataaneq atuuttungussappat qaammatini pingasukkaani akitsuutip 599 koruunit sipportassagai, unnuinerit 20-t nalingisa assigisaa, siunnersuutigineqarpoq. Taamaaliornikkut innuttaasuni akileraartarnermullu ingerlatsivimmi pisariaqanngitsumik allaffisorneq iliuseqarfigineqarpoq.

Akitsuut assersuutigalugu inimut ataatsimut taarsiullugu inunnut ataasiakkaanut akiligassiisutigineqaraangat, ilaatigut tamanna unnuinernik inuit namminersortut neqerooruteqartarnerata ilanngunneqarneranik kiisalu nunatsinni najugaqartunut atuutinninnissaa ersersinniarlugu peqquteqarpoq. Akitsuummik inuit akiliisussanngortinnerisigut naligiinngitsumik akitsuutip artukkiisinnaanera aamma pinngitsoortinniarneqarsinnaavoq, tassa inummut 1-imut imaluunniit 2-t akunnittarfimmi ini ataaseq assersuutigalugu tikeraanut unnuisunut amerlasuunut inissalimmi illuaqqamiinneq akitsuutip annertoqatigissagaluarmagu.

Unnuinermi akitsuut akitsuummik akiliisussaatitaasunut, akitsuummik akiliisitsisarlutillu akiliuteqartartussanut, aqukkuminartuussaaq. Tamanna minissinernik ikittuinnarnik taamaallaat siunnersuuteqartoqarnerata takussuserneqarpoq, matumani sivisuumik attartornerit unnuinermi akitsuummut ilaanngitsut ilanngullugit.

Inatsimmik aqutsinissamik akileraartarnermut ingerlatsivik pisussaaffilerneqarpoq. Inatsimmik ingerlatsinissaq pillugu erseqqinnerusunik maleruagassanik Naalakkersuisut aalajangersaasinnaassapput, matumani akitsuummit isertitanik kommunit qanoq atuisarnissaat ilanngullugu, najukkami nunallu immikkoortuani takornariartitsisarnerup ineriartortinneqarnera pillugu akitsuutip siunertaata eqquutsikkumallugu.

Akitsuummut atatillugu paasissutissat aamma akitsuutip nikingassutai tamarmiusut akilerneqarneri, qaammatit pingasut qaangiunneri tamaasa akileraartarnermut

ingerlatsivimmut akilerneqartassapput. Tamatuma kingorna kommuninut ataasiakkaanut aningaasanik tunniussinermut akileraartarnermut ingerlatsivik isumaginnittuussaaq. Akileraartarnermut ingerlatsiviup kommuninut aningaasanik tunniussinera, unnuinerit akitsuummik akiliuteqarfiusussat naatsorsorneqarsimasut katillugit qanoq amerlatiginerat malillugu ukiumut ataasiarluni ataatsimut pisassaaq.

Unnuineri akitsuummik kingusinaarluni ikisinermi ernianik naatsorsuinerup saniatigut, akitsuummik akiliisussaatitaasoq aamma akiliisinneqarsinnaavoq piffissaq eqqorlugu akitsuut akilerneqarsimanngippat. Tamanna aamma atuuppoq, akitsuummik akiliisussaatitaasoq aningaasanik ikippallaanik akiliisimappat imaluunniit nalunaaruteqarsimappat.

Siunnersuut tamatuma saniatigut akileraaruserinermik ingerlatsineq pillugu Inatsisartut inatsisaannut (akileraaruserinermik ingerlatsineq pillugu inatsit) atatillugu isigineqassaaq. Akileraaruserinermik ingerlatsineq pillugu inatsisip ilaatigut siunnersuummut atatillugu akileraartarnermut ingerlatsiviup sulianik suliarinnittarneranut aamma naammagittaalliutinik suliarinnittarneranut sunniuteqartut malittarisassat, nakkutilliinermut kingusinaartumik akiliinermi erniat, akiitsunik isumakkeerineq assigisaallu. Akileraartarnikkut akitsuutinullu inatsisit assigalugit Inatsisartut inatsisaata matuma aqunneqarnera, Inatsisartut inatsisaanni aalajangersakkanik aqutsinermut sunniuteqartunik immikkut aalajangersagaqanngippat akileraaruserinermik ingerlatsineq pillugu inatsimmi inatsisinut ilaatinneqassapput.

### **3. Pisortanut aningaasaqarnikkut allaffissornikkullu kingunerisassat**

Allaffissornikkut maleruagassat siunnersuutigineqartut kingunerisavaat, akitsuut akileraartarnermut ingerlatsivimmit aqunneqassasoq, matumani sulianik suliarinninneq aamma akitsuummik nalunaarsuinerinik nakkutilliineq, akiliutigineqartunik naatsorsuutitut nalunaarsuineq, kiisalu akitsuutip kommuninut agguannera akilerneqarneranut ilanngullugit.

Digitalimik nalunaarsuinerinik atortulersuutitigut tapersersuutinik ineriartortitsinermut atuutilersitsinermullu kiisalu immersuiffissanut aningaasartuutaanerusussat 0,5 aamma 1,0 mio. koruunit akornanniinnissaat ilimagineqarpoq. Taakku saniatigut inatsimmik aqutsinermut ukiumoortumik aningaasartuutit 0,3 mio. koruunit imaluunniit ukioq naallugu sulinerup affaa aningaasartuutigineqartarput. Allaffissornermi aqutsinermut ukiumut aningaasartuutit aningaasalersorneqassapput akitsuutinit isertitat kommuninut akiliinnginnermi 300.000 kr.-nik ilanngarnerisigut.

Siunnersuut qulaani taaneqartoq eqqaanngikkaanni nunap karsiata isertaqarneranik kinguneqassanngilaq.

Unnuinerit akitsuummik akiliuteqarfiusussat qassiuneri malillugit iluanaarutit aggornerinik kommunit tigusaqartassapput. Najukkami nunallu immikkoortuani takornariartitsisarnerup ineriartortinnissaanut taassuma kommuninit atorneqartarnissaat siunertaavoq, matumani

sumiiffimmi takornariartartut amerlineranni kingunerisat pitsaanngitsut millisinnissaat ilanngullugu.

Unnuinermi akitsuummik atuutilersitsineq nalornissutitaqarluartumik iluanaarutiniq 6,3 mio. koruunit missaanniittunik kinguneqarumaartoq ilimagineqarpoq, takussutissiaq 1 naapertorlugu. Iluanaarutit nunatsinni kommunit 5-it akornanni agguataarneqassaaq, najukkami nunallu immikkoortuani takornariartitsisarnerup ineriartortinneqarnerata tapersersornissaa siunertaralugu.

#### *Unnuisartut amerlassusiat*

Naatsorsueqqissaartarfik malillugu 2023-mi Kalaallit Nunaanni akunnittarfinni unnuinerit 359.042-simapput<sup>1</sup>. 2000-imiilli akunnittarfinni unnuinerit amerliartoruusaarsimapput. Taamaattoq pingaartumik Covid 19-imik nappaalanersuup nalaani angalanissamut killilersuinerit atorunnaarsinneqarnerisa kingorna, malunnaatilimmik amerleriaateqartoqarsimavoq. 2015-imit 2023-mut taamaalilluni unnuinerit amerlassusii agguaqatigiisillugu ukiumut amerleriaataat 6 pct.-ip missaaniissimavoq. Pingaartumik ukioq 2022 akunnittarfinniittorpassuarnik sunnigaasimavoq. 2023-mili kisitsisit taakku unittuusisimapput taamaalillunilu ukiup siuliani qaffasissutsimut assingulluni.

Ukiuni kingullerni 10-ni amerliartuaarneq taamatut sukkatigisumik ingerlaannassangatinneqanngilaq. Tamanna ilaatigut nappaalanersuup nalaani angalanissamut killilersuinerit atuuttut malitsigisaannik angalanissat kinguartitat angumaffiginissaat 2022-mi ilaatigullu 2023-mi taamaallaat pineqarunangilaq, ilaatigullu patsiseqarpoq pingaartumik takornariaqarfissuami, Ilulissani, piffissami ulapaarfionerpaami akunnittarfiit piginnaasaasa pioreersut atorluarneqartareernerannit.

Iluanaarutit sunniutissaattut naatsorsuutigisat naatsorsorneranni taamaalilluni 2023-mi akunnittarfinni unnuinerit amerlassusii aallaavigineqarsimapput, taamaalilluni taakku Naatsorsueqqissaartarfiup takornariartartut pillugit kisitsisaataani atuarneqarsinnaallutik, kinguliini allassimasut naapertorlugit. Namminersortuni unnuinerit amerlassusii takornariaqarnermi kisitsisinut ilaanngimmata, assersuutigalugu AirBNB imaluunniit kiffartuussissutit assingusut aqutugalugit namminersortuni unnuinerit amerlassusii taggissinikkut saqqummiunneqarput. Namminersortuni unnuisarfiutilinni unnuinerit 2024-mi 16.000-it missaanniissasut tagginneqarpoq. Taamaattoq nalornissuteqangaatsiartumik taggissineq pineqarmat eqqumaffigineqartariaqarpoq.

Matuma saniatigut Nuummi Ilulissanilu mittarfiit tallissusaat atorneqalerpata, unnuinerit amerleriaateqarnissaat ilimagineqarpoq. Unnuinerit amerlassusiinik taggissinermi, Rambøllip takornariaqarneq pillugu nalunaarusiaani tunngavissaatitaasut assingi assingusulluunniit

---

<sup>1</sup> Naatsorsueqqissaartarfik, takussutissiaq TUDHOT

atorneqangaatsiarput<sup>2</sup>. Ataatsimut isigalugu taggissineq nalorninerujussuarmik ilaqarmat eqqumaffigeqquneqarpoq, iluanaarutit sunniutissaattut naatsorsuutigisat taamaassangatinneqarputaaq.

### *Mittarfiit nutaat sunniutissaat*

Mittarfiit pioreersut tallilernerqarnerata, tikinneqarsinnaassutsip pingaartumik angalasut nunanit allaneersut amerleriaateqartissavai. Taamatutaaq pingaartumik Nuummut Ilulissanullu taakkunangalu angalanernut atasumik aningaasartuutit appariartinnissaat periarfissaavoq. Sulinermit piusumit, Rambøllimit saqqummiunneqartumit (2015), aallaaveqartumik ilimagineqarpoq, sumiiffinnut Ilulissanut aamma Sermersuup kitaanut nunanit tamalaanit angalasunut akiusut apparnerisigut, sumiiffinni taakkoqqissaani takornariartartut amerleriaateqarumaartut.

### *Nunatsinni najugalinnut naqqiissut*

Inatsisissatut siunnersuummi nunatsinni najugallit unnuigaangata akitsuummut ilaatinneqanngillat. Taamaammat naatsorsuinermit nunatsinni najugallit aamma nunat allanit takornariat akornanni immikkoortitsisoqarpoq.

Unnuinerit amerlassusissaattut kiisalu iluanaarutit sunniutissaattut naatsorsuutigisat, nalunaarsuiffik 1-imi atuarneqarsinnaapput.


<b>Nalunaarsuiffik 1</b>						
<b>Iluanaarutit sunniutigiumaagaatut naatsorsuutigisat</b>						
	<b>2025</b>	<b>2026</b>	<b>2027</b>	<b>2028</b>	<b>2029</b>	<b>2030</b>
Unnuisarfinni unnuinerit amerlassusii	372.162	383.949	396.951	411.318	427.220	444.845
Unnuinerit allat	16.582	17.227	17.944	18.741	19.628	20.617
<b>Unnuinerit katillugit</b>	<b>388.744</b>	<b>401.176</b>	<b>414.894</b>	<b>430.059</b>	<b>446.848</b>	<b>465.462</b>
- taakkunannqa nunatsinni najugallit	191.249	192.205	193.166	194.132	195.103	196.078
<b>Unnuinerit akitsuuserneqarnikut, katillugit</b>	<b>197.495</b>	<b>208.970</b>	<b>221.728</b>	<b>235.927</b>	<b>251.745</b>	<b>269.383</b>
Iluanaarutissatut naatsorsuutigisat (1.000 kr.)	<b>0,0</b>	<b>6.269,1</b>	<b>6.651,8</b>	<b>7.077,8</b>	<b>7.552,4</b>	<b>8.081,5</b>

Pissarsiffik: Naatsorsueqqissaartarfik namminerlu naatsorsuinerit.

*Nunani allani akitsuutit qaffasissusiinut, akitsuutip qaffasissusianik sanilliussineq* Visit Greenland *Kalaallit Nunaanni takornariartitsisarfirmut ilisimatuussutsikkut naatsorsuusiamini*, 2023, Europami unnuinermit akitsuutinik toqqartukkanik sanilliussisimavoq. Ataani takussutissiaq 1-imi taakku arlallit siunnersuummut tunngatillugu sanilliussinermi tunngavissatut ilanngunneqarsimapput. 30 koruuniimik akeqartitsinikkut, assersuutigalugu ilaqutariit sisamat marlunnik inersimasortaqlutillu marlunnik 8-nik aamma

<sup>2</sup> Takornariaqarneq - Mittarfiit ilusilersugaanerisa allangortinneqarnerat aqqutigalugu ineriartortitsineq annertusaanerlu, august 2015.

14-inik ukiulinnik meerartallit, nunatsinni najugaqanngippata, unnumni pingasuni tikeraarnerat akitsuummik 360 koruuniusumik akiliuteqaqquneqassapput. Nikingassutsinut tunngatillugu assigiinngitsunik peqarsinnaavoq, assersuutigalugu akunnittarfiup il.il. ulloriannattaavi qassiuppat, kisianni akitsuutip qaffasissusissaatut siunnersuutigineqartoq Europami tikinneqarsinnaasuni amerlasuuni qaffasissutsimut nalinginnaasumik sanilliunneqarsinnaavoq, takussutissiaq 1 naapertorlugu.



Pissarsiffik: Visit Greenland, *Kalaallit Nunaanni takornariartitsisarfirmut ilisimatuussutsikkut naatsorsuusi*, december 2023.

Nassuiaaneq: Assersuutigalugu inersimasunut marlunnut meeqqanullu marlunnut, arfineq-pingasunik 14-inillu ukiulinnut, nunatsinni najugaqanngitsunut unnuinerit pingasut. Kalaallit Nunaat aappalaartumik nalunaaqutsigaavoq aamma inuk ataasiugaangat, unnuk ataaseq unnuinermi akitsuutip 20 koruuniusussatut siunnersuutigineqarnera aallaavigalugu naatsorsuisoqarsimavoq.

#### 4. Inuussutissarsiortunut aningaasaqarnikkut allaffissornikkullu kingunerisassai

Siunnersuut nunami maani akunnittarfinnut attartortitsisartunullu allanut aningaasaqarnikkut allaffissornikkullu pitsaanngitsunik kinguneqaatinik nassataqarsinnaasoq ilimagineqarpoq. Akunnittarfiit eqqarsaatigalugit unnuisut qassiunerannik nalunaarutiginninnerit aallaavigalugit, naatsorsuutitut nalunaarsuinerminni atortulersuutiminnik pioreersunik annikitsumik naleqqusaanissaat ilimagineqarpoq.

Akunnittarfiit unnuisarfiillu allat, 5-it sinnerlugit siniffillit manna tikillugu Naatsorsueqqissaartarfimmumut paasissutissanik nalunaaruteqarnarsimapput. Nalunaaruteqarnerit taakku qaammatit tamaasa pisarput, qaammatip tulliuttup ulluisa 5-iat nallertinnagu. Unnuinerit tikeraallu tikittut amerlassusii pillugit paasissutissat nassiunneqartarput, kingulliit taaneqartut nunanut tamalaanut assigiinngitsunut agguataarsimallutik.

§ 5, imm. 1-imiittoq maleruagassaq, attartortitsisartut naatsorsueqqissaartarfimmumut nalunaarusiortussaataareersut nalunaaruteqarnissamik pisussaaffigeriigaannik, annertusissatut isumaqarfingineqanngilaq.

Paarlattuanik maleruagassap kingunerissavaa, attartortitsisartut mikinerit arlallit maleruagassat atuuttut malillugit Naatsorsueqqissaartarfimmumut nalunaarusiortussaataanngitsut, ilanngutsinneqarnissaat tassami akitsuummik akiliisussaataasut inuit, taamaalillunilu inatsisip § 5-ia malillugu paasissutissiisussaataasut, maannakkut Naatsorsueqqissaartarfimmumut nalunaartussaataasuninngarnit amerlanerusut.

### **5. Avatangiisinut, pinngortitamut inuillu peqqissusaannut kingunerisassai**

Siunissami isertitat siunertarineqartumut atorneqarnerat ilutigalugu avatangiisinut pinngortitamullu pitsaasumik sunniuteqarnissamut siunnersuut sunniuteqaqataasinnaavoq, tamatuma saniatigut takornariaqarneq iluaqussavaa, avatangiisit pinngortitamullu tunngasunut siunertat iluaquserneqassallutik.

Innuttaasut peqqissuunerannut kinguneqaatinik annertuunik siunnersuut pilersitsissanngitsoq nalilerneqarpoq.

### **6. Innuttaasunut kingunerisassai**

Innuttaasut nammineq inigisaminnik AirBnB aqutigalugu illuaraatinillu assigisaannillu attartortitsisartut, qaammatit pingasut ingerlanerani 600 kr.-nik amerlanerusunilluunniit, unnuinernut 20-nut naleqartunik akitsuusiisut, akitsuummik akiliuteqarnissamut ilanngunneqassapput.

Taamattaaq inuttaasut illuaqqanik, hotelimi ininik, ininik assigisaannillu inatsimmut uunga ilaasunik attartortitsisut, attartortumit akitsuummik akiliisitsissapput.

### **7. Kingunerisinnaasai pingarnerit allat**

Inatsisissatut siunnersuut naalagaaffeqatigiinnermut tunngasunik imaqanngilaq.

## **8. Pisortanik aamma kattuffinnik il.il. tusarniaaneq**

Siunnersuut piffissami 14. juni 2024-mit 12. juli 2024-mut tusarniaaffittut illuatungerisanut tusarniutigineqarsimavoq:, Sulisitsisut (GE), Visit Greenland, Sulinermik Inuussutissarsiuqartut Kattuffiat (SIK), nunatsinni advokatit, Siulittaasup Naalakkersuisoqarfia, Nunanut Allanut, Inuussutissarsiornermut Niuernermullu Naalakkersuisoqarfik, Ineqarnermut Attaveqaasersuutinullu Naalakkersuisoqarfik, Nunalerinnermut, Imminut Pilersornermut, Nukissiutinut Avatangiisinullu Naalakkersuisoqarfik, Aatsitassanut Inatsillu atuutsinneqarnerannut Naalakkersuisoqarfik, Isumaginninnermut Naalakkersuisoqarfik, Suliffeqarnermut Nunamullu Namminermut Naalakkersuisoqarfik, Aalisarnermut Piniarnermullu Naalakkersuisoqarfik, Meeqqanut, Inuusuttunut Ilaqutariinnullu Naalakkersuisoqarfik, Peqqissutsimut Naalakkersuisoqarfik, Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik, Avannaata Kommunia, Kommune Kujalleq, Kommune Qeqertalik, Qeqqata Kommunia aamma Kommuneqarfik Sermersooq, Deloitte, Grønlands Revisionskontor, BDO, PWC, SFAI Grønland Statsautoriserede Revisorer ApS, Visit Greenland, KNAPK, Air Greenland, Arctic Circle Business, Innovation South Greenland, Qeqertalik Business Council, Sermersooq Erhverv, Nuuk Maritime Network, Royal Arctic Line A/S, Arctic Umiaq Line A/S, AECO (Association of Arctic Expedition Cruise Operators), KNI, Blue Water, NUSUKA.

Siunnersuut aammattaaq Naalakkersuisut tusarniaavianni [www.naalakkersuisut.gl](http://www.naalakkersuisut.gl)-imi tamanut takusassiarineqarnikuvoq.

Tusarniaanermi akissutigineqartut pisariaqarnera naapertorlugu ilanngunneqarput.

Tusarniaaneq pillugu allakkiamut tunngatillugu ilanngussaq 1 innersuussutigineqarpoq.



## Siunnersuummi aalajangersakkanut ataasiakkaanut nassuiaatit

### § 1-imut

#### Imm. 1-imut

Unnuinnerit atorneranni unnuinerit pineqarput nunami maani pisut, matumani inuk siniffimmik atugassinneqartoq pineqarluni. Unnuisarfimmut aalaakkaasunik iigaqarlunilu nateqarneq naatsorsuutigineqarpoq.

Tupermi unnuisarfik, akiliillutik pulaartunut aasaanerani atorneqarsinnaasoq ilaatinneqartutut isigineqarpoq.

Imaatigut angalanermi angallammiinnermilu unnuineq, inatsisip maleruagassartaanut ilaanngilaq.

Pisumi nalinginnaasumi tikeraartoq akunnittarfimmi, hostelimi, unnuisarfimmi, AirBnB aqutugalugu inissiami attartukkami najugaqarfimmillu sivikitsumik allatut attartortitsinermi, matumani assersuutugalugu containerit najugaqarfissiat ilanngullugit, tassaasarpooq unnuisartoq. Ineeqqanik attartortitsineq, tassunga ilanngullugit ineeqqat tiiliortarfillit (inissiat ataatsimik inillit), aamma ilaapput. Akitsuummumut akiliisussaataasunut aamma imm. 1-imi taaneqartunit allaanerusunik ininik unnuinerit ilaapput, takuuk oqaaseq "assigisaallu". Oqaatsimi tassani inini ininut, containerinik najugaqarfinnut il.il. sanillersuunneqarsinnaasut ilaatinneqarnissaannik siunertaqarpoq. Tassunga assersuutigineqarsinnaapput campingvognit autocamperillu.

Inuinnaat akeqanngitsumik ineqartitsisut inatsimmut ilaatinneqanngillat. Ilaquttanit tikeraarneqarnerit il.il. akiliisitsiviunngitsut akitsuummumut akiliisussanngortitsisinnaanngillat.

Pisuni, assersuutugalugu sanaartornermik suliniuteqarnermut atatillugu sanaartortitsisartoq containerimik najugassiamik pisippat, sulisuminullu akeqanngitsumik atugassiisutugalugu tamanna akissarsissutugalugu attartortitsinertut isigineqanngilaq. Containerip atorsinnaaneranut sulisut attartornermut akiliuteqartarpata, akissarsissutugalugu attartortitsinertut isigineqassaaq. Taamaakkaluartoq pisoq kingulleq, siunnersuutip § 3, imm. 1, nr. 2-ani ilaappat, akitsuummik akiliisussaataanermit ilanngunneqassanngilaq.

#### Imm. 2-mut

Inuk nunanit allaneersumut ataatsimut akitsuut 30 koruuniussaaq.

Inuit nunatsinni najugallit akitsuummik akiliuteqarnissamut pisussaataaassanngillat. Pisussaataaangissitsineq aningaasat pingaarnermik takornariartitsinermik ineriartortitsinermut pisarnissaat siunnerfeqarpoq.

Imm. 3-mut.

Imm. 3 aalajangersaavoq, inatsit naapertorlugu akitsuummik akiliisussaataasut imm. 1-imi taaneqartunik tassaasut akiliisitsillutik unnuisitsinernik neqeroorteqartut. Attartortitsisut kikkulluunniit akitsuummik akiliisussatut isigineqarput, tamanna inuussutissarsiummik ingerlatsisutut isigineqarnera imaluunniit akileraartarnikkut inatsimmut allamut naapertuunna apeqqutaatinnagit.

Imm. 4-mut

Akitsuummik akiliisussaataasup uppernarsaammik takutitsisussaanera eqqarsaatigalugu, uppernarsaammik takutitsisoqarnissaanik apeqquteqartoqarnerani nunatsinni najugallit pisussaaffilerneqarput. Uppernarsaat attuumassuteqarsinnaasoq najugaqarnermut uppernarsaataasinnaavoq imaluunniit assingulluni.

#### *§ 2-mut*

Akitsuummik akiliisussaataasup unnuinermut ataatsimut arlalinnilluunniit akiliisitsinermini akitsuummik akiliisitsisussaanera malittarisassakkut aalajangersarneqarpoq.

#### *§ 3-mut*

Imm. 1, nr. 1-imut

Piffissap akitsuusiiffiup ingerlanerani minnerpaaffiliussaq 600 koruuniuvoq. Minnerpaaffiliussaq attartortitsisunut tamanut, ataatsimik arlalinnilluunniit unnuisarfiuteqarnera apeqqutaatinnagu atuuppoq.

Tamanna ima isumaqarpoq, attartortitsisoq qaammatit pingasukkaat ingerlaneranni akitsuutip aningaasartaanik katillugit 600 koruuninik ikinnerusunik akiliisitsilluni unnuiffissamik ataatsimik arlalinnilluunniit unnuiffissatut atugassiisoq, akitsuummik akiliisussaataanermut ilaanngilaq.

Akiitsuummik akiliisussaataaneq atuutilersarpoq attartortitsineq pigaangat, taamaalillunilu akitsuummik akiligassat katillugit 600 koruuniullutik imaluunniit qaammatinik pingasukkaanit amerlanerullutik. Taamaattoqartillugu piffissami akitsuusiiffiusumi attartortitat tamakkerlutik, unnuinerit 20-t imaluunniit qaammatikkaanik pingasunik amerlanerusut pineqarsimappata, akitsuummik akiliisussaataanermut ilaassapput.

Pisuni akitsuummik akiliisussaataasup unnuisuminit akitsuummik akiliisitsinerani, piffissamili akitsuusiiffiusumi akitsuummik akiliutit 600 kr.-nik minnerutillugit, akitsuutitut akilersinneqartut akitsuummik akiliisussaataasumut nakkartinneqartassapput. Pisuni

akitsuummut akiliisussaataasup, akitsuutinik akiligassat 600 kr.-nit annikinnerunissaannik ilimagisaqarluni akitsuummik akiliisitsisimannginnerani, akitsuusiisussaataasup piffissami akitsuusiiffimmi akitsuutip 600 kr.-unerannik annertuneruneranilluunniit kingusinersukkut paasisaqarnermi, nammineerluni akitsuummut aningaasartuut akilissavaa.

Imm. 1, nr. 2-mut

Najugaqarfissatut sivisuumik attartortitsineq ullut 21-t (sapaatit akunneri 3-t) sinnerlugit sivisutigisoq, unnuisarfimmi ataatsimi, unnuinermi akitsuusiinermik akiliiffiusassanngitsoq siunnersuutigineqarpoq.

Najugassatut sapaatit akunneri 3-t sinnerlugit sivisuumik attartortitsineq, najugaqarfissatut nalinginnaasumik attartornertut, matumani attartortoq ineqarnermut akiliuteqartarmat, isigineqarpoq.

Sivisuumik attartortitsinerup ilaatinneqannginnera ilaatigut sulinermi atugassarititaasut, matumani angalasoq sulinerminik ingerlatsiartorluni sapaatit akunneri 3-t sinnerlugit sumiiffimmi ataatsimi inissisimasoq, mianeriumallugit ilaatigut ilanngunneqarsimavoq.

Taamaammat sivisuumik attartortitsinermi pisunut ilaassaaq, piginnittup illu aalajangersimasumik pigisani universitetimut attartortippagu taassumalu piffissami sapaatit akunneri 3-t sinnerlugit atuartitsisuminut ataatsimut amerlanerusunulluunniit illu inissisimaffissatut atorpagu.

Ilaatitsinnginnermut pisoq aamma ilaasoq tassaavoq, suliffeqarfiutilik sanaartornermik suliniummut atatillugu containerimik najugaqarfissiamik, qamummik assigisaanilluunniit attartorpat, taakkulu piffissami sapaatit akunneri 3-t sinnerlugit sivisutigisumi sulisuminut atugassiissutigalugit.

Imm. 1, nr. 3-mut

Angallassisup inummik silap ajornera pissutigalugu, teknikikkut ajornakusooruteqartoqarnera assigisaalluunniit patsisigalugit unnuisitsinerani, angallassisullu unnuinermut aningaasartuutinik akiliinerani, akitsuummik akiliisitsisoqartannginnissaa siunnersuutigineqarpoq. Taamaalilluni akitsuutip timmisartortitseqatigiiffinnut il.il. akitsorsaasuunnginnissaa, taamaalillunilu billetit akisunerulernerannik kinguneqannginnissaa pingaartinneqarpoq.

Ilaatitsinnginneq taamaallaat soorlu silap ajornerani, teknikikkut ajornakusooruteqartoqarnerani assigisaanilluunniit siumut takorloorneqarsinnaanngitsunik taamaatitsinerni, taamaallaallu angallassisup pissutsit taaneqartut malitsigisaanik inunnik angalasunik unnuisitsisariaqarnerani atuutissaaq.

Imm. 2-mut

Sivisuumik attartortitsineq pillugu ilaatitsinnginneq atuutissanngilaq, unnuisitsinermut, unnuinermi akitsuummut ilaasussaagaluartunut, attartorteqqiniarluni sivisuumik attartortitsineq pisimappat. Assersuutigalugu piffissap aalajangersimasup ingerlanerani angalaqatigiinnernik aaqqissuussinermut imaluunniit allatut takornariartunut attartortitsinermut ilaasumik.

Attartortitsisup akitsuummik akiliisussaatitaasup assersuutigalugu angalatitseqatigiiffimmut attartortitseqqittussamut sivisuumik attartortitsinermik isumaqatigiissuteqarfigisaani, akitsuummik akiliisussaatitaasoq piffissami sivikitsumi attartortitsinertut akitsuummik akiligassiillunilu akitsuummik ingerlatitseqqittassaaq.

#### *§ 4-mut*

##### *Imm. 1-imut*

Akitsuummik akiliisussaatitaasut unnuinermi akitsuut pillugu qaammatit pingasukkaarlugit nalunaarsuisarnissaat siunnersuutigineqarpoq.

##### *Imm. 2-mut*

Akitsuut akileraaruseriffimmut maleruagassani § 4, imm. 2 malillugu akilerneqartassaaq, Piffissaq akiliiffissaq aamma unnuinermi akitsuutip akilernissaanut piffissaliussaq aalajangersakkap aalajangersaaffigai.

Aningaasarsianit akileraarutit pillugit Inatsisartut inatsisaat aamma Sulisoqarnermut Akitsuut pillugu Inatsisartut inatsisaanniittut, akileraarummik A-mik akiluteqarnermut, sulisoqarnermut akitsuummut il.il. maleruagassat taamaaqataat taakku malippaat.

Piffissap akitsuuteqarfiusup kingorna qaammatip tulluuttup ulluisa aallaqqaataanni unnuinermi akitsuut akilerneqassaaq. Tassa imaappoq, ukiumi pineqartumi qaammatikkaat pingasut siullianni akitsuummut akiligassaq ulloq 1. maj akilerneqassaaq.

Ulloq akiliiffissaq kingulleq arfininngorneruppat, sapaataappat nalluuttuuppalluunniit piffissarititaasoq ulluinnarmut tullermut sivitsorneqassaaq.

#### *§ 5-imut*

Qaammatikkaat pingasut qaangiunnerata kingorna, kinaanerminut paasissutissat saniatigut akitsuummik akiliisussaatitaasup, qaammammi ataatsimi unnuinerit qassiusimanersut, inuit qassiusimanersut aamma akitsuutip aningaasartaasa amerlassusiat pillugit paasissutissat akileraaruseriffimmut nassiuutissavai.

Paasissutissanik kingusinnerpaamik nassiuussinissamut piffissaliussaq tassaavoq, qaammatikkaat pingasut naanerata kingorna qaammatip tulluuttup ulluisa qulingat.

Qaammatikkaanut pingasut siullianni (januarimit marsimut) taamaalilluni paasissutissat ukiumi pineqartumi kingusinnerpaamik 10. april nassiunneqassapput.

Paasissutissat nassiunnissaannut piffissaliusseq kingulleq arfininngorneruppat, sapaataappat nalliuttuuppal-luunniit piffissarititaasoq ulluinnarmut tullermut sivitsorneqassaaq.

Piffissaliusseq aalajangersarneqarnikuvoq, taamaalilluni akileraarutinut A-nut aamma sulisoqarnermut akitsuummut nassuiaatit nassiunneqartarnerannut piffissaliussap assigalugu, akileraartarneq pillugu inatsisartut inatsisaanni § 81, imm. 3, aamma sulisoqarnermut akitsuut pillugu Inatsisartut inatsisaanni § 4 naapertorlugit. Akitsuummik akiliisussaataasut arlaqartut taamaamat unnuinermut akitsuummut ulloq piffissaliunneqartoq, sulisitsisuunerminnut naapertuuttumik, ilisimariissavaat.

Taamaalilluni akitsuummik akiliisussaataasut piffissami pineqartumi paasissutissanik paarisqaarnissaat, akileraaruseriffimmut nassiunneqartussanik, mianerineqarsimasoq tassa akitsuut unnuinermut akiliinermut ilanngullugu akilersinneqarnikummat, § 1, imm. 2 naapertorlugu.

Imm. 2-mut.

Akileraaruseriffiup immersugassat, matumani digitaliusut ilanngullugit, paasissutissanik nassiussinermut atugassat suliarissavai.

Imm. 3-mut

Akitsuummik akiliisussaataasuninngaanniit paasissutissanik amerlanerusunik, kisitsisitigit nalunaarsuinermik siunertanuinnaq atorneqartussanik pissarsiniarnissamut Akileraartarnermut Aqutsisoqarfik pisinnaatinneqarpoq. Matumani pineqarput paasissutissat ullumikkut maleruagassat malillugit Naatsorsueqqissaartarfimmut toqqaannartumik nalunaarutigineqartartut. Paasissutissat inunnut ataasiakkaanut tutsinneqarsinnaanngitsunngorlugit pissarsiarineqarsinnaapput.

Taamaalilluni akitsuummik akiliisussaataasuniit nalunaarutigineqartut ima aqqissorneqarsinnaapput, siunissami akitsuummik akiliisussaataasut sumiiffimmut ataasiinnarmut nalunaaruteqartalissallutik, tassalu Akileraartarnermut Aqutsisoqarfimmut.

### § 6-imut

Akitsuummik akiliisussaataasoo akitsuut piffissaq eqqorlugu akilertarsimangippagu, inummut nalunaaruteqarnissamut imaluunniit akiliinissamut sivikinnerusumik piffissaliussamik pisussaaffilerneqartassasoq siunnersuutigineqarpoq, sulisoqarnermut

akitsuummumut aamma A-mik akileraarutinit akiligassanik piffissaq eqqorlugu akiliisoqannginnerani periutsip assinganik. Taamatut pisoqartillugu aningaasat annertussusiat 600 kr.-t § 3, imm. 1, nr. 1-imiittoq appartinneqassaaq, piffissami sivikillisamut assigiilersillugu. Akiliinissamut piffissaq assersuutigalugu qaammammik 1-imik sivikillineqarpat taakku 600 kr.-nit pingajorarterutaannik (200 kr.-nut) akilineqassapput.

Akileraaruseriffik piffissarititaasunut nalinginnarnut utertoqarnissaanik aalajangiissaaq, akileeqquneqartoq piffissami qaammatit 3-t ataannagit, nalunaaruteqartussaataaneq akiliisussaataanerluunniit naammassisimappagu.

### *§ 7-imut*

Akileraaruseriffiup paasippagu akiliisussaasoq paasissutissanik eqqunngitsunik nassiussimasooq aamma tamanna tunngavigalugu akitsuummumut akiliinikippallaartoq, akileraaruseriffiup akiligassaq, qaangiuttoorluni erniaq ilanngullugu, akileqqussavaa (tassa imaappoq akiliisussap akilikkami aamma akiligassami assigiinnngissutaa). Akiliinissamut ullut 14-it piffissaliunneqartassaaq.

Pillaatitut erniat naatsorsorneqarneranni maleruagassat, akileraaruserinermik ingerlatsineq pillugu Inatsisartut inatsisaanni § 43 malippaat.

Akitsuut piffissamut akilerneqanngippat, akiliiffissatut ulluliussap qaangiunneranit qaammatit aallartinneri tamaasa, akitsuutip aningaasartaasa 1 pct.-imik akitsuummik akiliisussaataasoq pillaatitut ernianik akileeqquneqassaaq.

Assersuut: Akitsuummik akiliisussaataasup unnuinermi akitsuut qaammatikkaat pingasut siulliannut akiligassaq ulloq 15. maj akilerpagu, qaammatinit aprilimut aamma majimut pillaatitut erniat akilersinniarneqarsinnaapput. Pillaatitut erniat akilerneqanngitsut, qaammammumut kingumoortumik immikkut ittumik akilersinniarneqartassapput. Pineqartut pillaatitut erniat Nunatta Karsianut ikineqassapput.

### *§ 8-mut*

Imm. 1-imut

Akitsuummumut akilerneqartut kommunini ataasiakkaanni unnuinertut nalunaarsorneqartut amerlassusaat naapertorlugit kommunit akornanni agguarneqassapput.

Isertitat kommunit namminersorlutillu oqartussat naatsorsuutaat missingersuutaallu pillugit Inatsisartut inatsisaanni malittarisassat naapertorlugit kommunini missingersuutit inissisimanerannik naatsorsuinermi ilanngunneqartarnissaat, tamatuma kingunerissavaa.

Imm. 2-mut

Iluanaarutinit nunatsinni kommuninut agguataarneqartussanut, ukiumi pineqartumi ulloq 31. december unnuinerit nalunaarsorneqarsimasut amerlassusiat atorneqassaaq.

#### Imm. 3-mut

Piffissami kingusinnerusumi akitsuutip kommuninut agguataarneqarnera tunniunneqarneralu akileraaruseriffiup isumagissavaa. Tunniussineq ukiumut ataasiarluni pisassaaq.

Akitsuutip tunniunneqarnissaanut piffissaliussaq inatsisikkut aalajangersagaangilaq, tassami ukioq tulliata naalerneranut naatsorsuusiorneq aalajangersarneqarmat. Aalajangersagaq – manna piffissaliussami – akileraaruseriffiup naatsorsuusiornissamut piffissaliinissamik periarfissiivoq, tassani akileraarutinit allanik imaluunniit akitsuutinit assingusunik naatsorsuuserinermut piffissaq naapertuutissamat, taamaattoq kommunit naatsorsuutinit tunniussisarnerat mianeriniarneqassalluni.

Akitsuummik allaffissornikkut aqutsinerup, tassunga ilanngullugu naleqquttumik nakkutilliinerup, aningaasalersorlerneranut, aningaasat kommunimut akilernerqartut katillugit 300.000 kr.-nik ilanngarneqassapput. Naatsorsuutigineqarpoq kommuninut akilikkat ataasiakkaat imm. 1-imi agguaneq malillugu ilanngarneqartassasut.

#### Imm. 4-mut 5-imullu

Unnuineri akitsuut atorlugu siunertaasoq tassaavoq, kommunini takornariartitsisarnerup inerisarnissaanut tapiissuteqartarnissaq, matumani sumiiffimmi takornariaqarnerup annertusinerani pitsaanngitsunik kinguneqaatit sakkukillisinnissaat aamma ilanngullugu.

Akitsuummiit isertitat kommuninit atorneqarsinnaapput ilaatigut pinaveersaartitsinermik suliniutinit, atortulersuutit pigineqareersut aserfallatsaalinerinit pitsanngorsarnerinulluunniit kiisalu atortulersuutinit nutaanik sanaartornissamut. Tassaasinnaapput tikeraanut anartarfisigullu atortulersuutit, sumiiffimmi takornariartartut amerlanerulernerisa malitsigisaattut.

Akitsuutip siunertaanut naapertuuttumik isertitat kommuninit atorneqassapput. Taamaalluni inatsit una naapertorlugu isertitat kommunit pissarsiarisaat, kommunip tamakkiisumik isertitanut tunngavigisaanut ilanngunneqarnissaat siunertaangilaq. Kommunip naatsorsuutaani isertitat taakkunungalugu atasumik aningaasartuutit kommunit immikkut nassuiaateqarfigisassavaat, inatsit una naapertorlugu isertinneqarsimallutillu akiliutigineqarsimasut. Tamanna assersuutigalugu naatsorsuutini nalunaarsuummik allagaqarnikkut pisinnaavoq.

Isertitat kommunit namminersorlutillu oqartussat naatsorsuutaat missingersuutaallu pillugit inatsisartut inatsisaanni malittarisassat naapertorlugit kommunini missingersuutit inissisimanerannik naatsorsuineri ilanngunneqartarnissaat, tamatuma kingunerissavaa.

### § 9-mut

Inatsisip atuutilersinneqarnerata ingerlanneqarnerani Naalakkersuisut malittarisassanik erseqqinnerusumik aalajangersaasinnaatitaanermut piginnaatinneqarput, tassani paasissutissanik erseqqinnerusunik, akitsuummumut akiliisussaataitaasup nalunaarutigisassaatur kissaatigineqartut ilanngullugit, tak. imm. 1.

Imm. 2 malillugu, akitsuummik akiliisussaataitaasup uppersaanissaa paasaqartussaataitaneralu kiisalu akitsuummik akiliisussaataasumut illumik attartortitsisumit inummit paasissutissinneqarnissaq pillugit Naalakkersuisut maleruagassanik aalajangersaasinnaapput.

Tamatuma saniatigut isertitanik kommunit atuisinnaanerat aamma isertitat aningaasartuutillu, unnuinermi akitsuummumut isertitanit matussuserneqartartut, pillugit kommunit naatsorsuutininik tunniussisarnissaat pillugu erseqqinnerusunik maleruagassanik Naalakkersuisut aalajangersaasinnaapput, imm. 3 naapertorlugu.

### § 10-mut

Paasissutissanik eqqunngitsunik salloqittaataasunillu, pineqartumik aalajangiinissamut imaluunniit akitsuummumut akiliinissap aamma akitsuutip naatsorsornissaata allat aalajangersaanissaannut akileraaruseriffiup atugassaanik tunniussineq aalajangersakkap pinerlunninngortippaa.

Akitsuummumut akiliinngitsoorneq, ukioq isertitaqarfiusoq eqqarsaatigalugu, paasissutissat eqqunngitsut salloqittaataasullu eqqaasaat, nalinginnaasumik pisortat iluanaarutinit annaasaqarnerattut piviusunngortinneqartarpoq. Paasissutissanik eqqunngitsunik salloqittaataasunilluunniit tunniussinikkut unioqputitsineq piviusunngortarpoq, tassa piviusunngortitsinermi iliuuseqarneq siuartinneqarmat. Nalinginnaasumik isigalugu akitsuutinik nalunaarutiginninnermi kukkusumik amigaatilimmilluunniit paasissutissiisimanermik toqqammavissarsiornerit utoqqatsissutissaanngillat.

Eqqunngitsutut isigineqarpoq paasissutissiisup paasissutissat ilumut eqqunngitsuunerat ilisimagaluarlugu, eqqunngitsuunerat ilimagilluinnaraluarlugu taamaassoriinnaraluguluunniit taamatut paasissutissanik tunniussinera. Paasissutissat eqqunngitsut akileraaruseriffimmumut salluliornissamut atorpeqarsinnaasutut naleqqummata, pineqaatisiisinnissamut tamanna piumasaqaataanngilaq. Paasissutissatut salloqittaatit saqqummiunneqarput, matumani paasissutissat imminni eqqortuugaluartut nipangiussinernik tamakkiisuunngitsunillu paasissutissiinernik ilaartorneqarsimagaangamik, naggataagut inernerusooq tassaasarpoq akileraaruseriffiup salloqittagaaneranik.



### § 11-mut

Akiligassiissuteqarnissaq pillugu akuersissuteqarnikkut, § 10-mik unioqqutitsineq pillugu suliat aalajangiiffigineqartarnissaat aalajangersakkamit tunngavissinneqarpoq.

#### Imm. 1-imut

Suliaq, unnerluunneqartoq pisut nassuiarneqartut nassuerutigalugit pisuusutut nassuerpat akiligassiissutigineqartumillu taaneqartumik akiliinissaminut pisussaaffilerpat allaffissornikkut akiligassiinikkut taamaallaat naammassineqarsinnaavoq. Unnerluunneqartup assersuutigalugu suliap pilertortumik naammassinissaa eqqarsaatigalugu akiligassiissutip akilernissaa akuerippagu, kisianni pisuusutut nassuersinnaanani, suliap naammassineqarnissaanut piunasaqaatit naammassineqarsimassanngillat. Allaffissornikkut akiligassamik akuersineq akileraaruseriffiup unnerluunneqartullu akornanni isumaqatigiissuteqarnertut isigineqarsinnaavoq. Unnerluunneqartup taama isumaqatigiinnissaq kissaatiginngippagu, imaluunniit tamanna pillugu akileraaruseriffiup saaffiginnissutaanut qisuariangippat, suliaq Kalaallit Nunaanni politiinut nalunaarutigineqassaaq, unnerluussissutip naammassiniarneqarnissaa aamma suliap eqqartuussivikkoortumik aalajangiiffigineqarnissaa pillugu qinnuiginninnermik ilaqartumik.

#### Imm. 2-mut

Unnerluussissutitut eqqartuussiveqarnermut inatsimmi kapitali 38-miittut piunasaatit akiligassiissummi eqquutsinneqassapput. Tamatuma saniatigut akiligassiissut unnerluunneqartup kinaassusianik eqqoqqissaartumik imaqartoq aamma pissutsit unnerluussissummi saqqummiunneqartut nassuiarneqarnerannik imaqassaaq. Taamatuttaaq aalajangersakkat unioqqutinneqarsimasinnaasut eqqoqqissaartumik nalunaarutiginerannik nassuerutiginninneq imaqassaaq, aammattaaq unioqqutitsinermi taama ittumut ilaasut suliniuteqarnissamut aalajangersakkat sorliunersut nalunaarsorneqarsimassapput.

#### Imm. 3-mut.

Akileraaruseriffiup akiligassiissutaanik unnerluunneqartup akuersinera isumaqarpoq, akisussaanermut apeqqut inaarutaasumik naammassineqartoq aamma akiligassiissummik akuersinerup taamaalilluni eqqartuussivimmi suliarinninnissaq taarseraa. Allaffissornikkut akiligassiinermik suliat taaneqartut aalajangiiffiginissaannut akileraaruseriffik imaluunniit Aningaasaqarnermut Akileraarutinullu Naalakkersuisoqarfiup pisinnaatissagai naatsorsuutigineqarpoq.

### § 12-imut

Aalajangersimasumik periusaasut malillugit akiliisitsinerit § 10 imaluunniit § 11 malillugu akilersinneqartut Nunatta Karsianut nakkartinneqassapput.

*§ 13-mut*

Inatsit ulloq. 1. januar 2026 atuutilissaaq. Unnuinermut akitsuutit ulloq 1. januar 2026-mi kingusinnerusukkulluunniit akileqquneqassapput.

**Ilanngussaq 1****Tusarniaaneq pillugu allakkiaq**

Tusarniaanermut atatillugu tusarniaavigisanit tulliuuttunit tusarniaanermut akissutinik, siunnersuummut oqaaseqarfiginninngitsunik tigusaqartoqarpoq: Aalisarnermut Piniarnermullu Naalakkersuisoqarfik, Meeqqaanut inuusuttunullu Naalakkersuisoqarfik, Avannaata Kommunia aamma Sulisitsisut.

Tusarniaavigisat tulliuuttut siunnersuummut oqaaseqaatitalinnik tusarniaanermut akissutinik nassiussipput:

Trophy Hunting Greenland, Sisimiut- og Kangerlussuaq Vandrehjem, Greenland Airports, Visit Greenland, Kommuneqarfik Sermersooq, Arctic Circle Business, Hotel Sisimiut, Inuussutissarsiornermut, Niuernermut, Aatsitassanut, Inatsisit atuutsinneq2arnerannut Naligiissitaanermullu Naalakkersuisoqarfik, Air Greenland A/S, Hotel Hans Egede A/S, Kommune Kujalleq aamma Innovation South Greenland.

Tulliuuttuni tusarniaaffigineqartut oqaatigisaat pingaarnerit nalinginnaasumik allanneqarput, Naalakkersuisullu oqaatigisaat *uingasumik* allanneqarlutik.

**Trophy Hunting Greenland**

Trophy Hunting Greenland (THG) akitsuummik atulersitsineq nalunaarsuilluni sulianik annertuunik kinguneqassasoq oqaatigaa, tassani aamma piffissami piniartitsinerup ingerlanera eqqarsaatigalugu suliarissallugit ajornakusoorfianni. Suliffeqarfiup piniartitsisarneri, ilaatigut aalisartitsinerni, uumasunik piniarnerni il.il. akitsuusigaareersut, ilanngullugu oqaatigineqarpoq. Ilanngullugu piffissani ukiup qanoq ilinera apequtaatillugu ulapaarfiusuni killiliussap iluani unnuinerit pillugit paasissutissanik nalunaarsuinissap ingerlanneqarnera ajornakusuussasoq oqaatigineqarpoq.

*Tusarniaanerup kingorna 'tupit aalaakkaasumik natillit' 'tupit'-nik taarserneqarput, tassani akiliilluni tupermi unnuinerit ilaalissammata. Unnuisitsisarnernik neqeroorutigineqartut naligiimmik unammillernissaat qularnaarniarlugu, inoqarfinni unnuisitsinerit qaqqamilu il.il. illuaqqani unnuisitsinerit immikkoortinneqanngillat.*

*Tusarniaanerup kingorna akitsuut inummut ataatsimut 30 kr.-nut inissinneqarpoq, kommuninilu takornariartitsinermik suliniarnerup nukittorsarnissaa siunertaavoq. Suliffeqarfiit takornarialluunniit akitsuutinik allanut siunertaqartunik eqqugaanissaasinnaanerat pisinnaavoq.*

*Unnuinernut paasissutissanik nalunaaruteqarnissamut killiliussaq akileraartarnermut immikkoortumi killiliussat allat assigaat, tassani assersuutigalugu akileraarutinik A-nik*

*nalunaaruteqartarnermut killiliussaq ilanngullugu. Akitsuutinik akiliisussaataasut ilaannut inatsimmi killiliussap unammilligassiisnaavoq. Piviusumili akitsuutinut akiliisussaataasunik tamanik isiginiagaqartumik killiliussamik nassaarniarneq ajornakusoorpoq.*

#### Sisimiut og Kangerlussuaq Vandrehjem

Sisimiut og Kangerlussuaq Vandrehjem (SKV) inummut ataatsimut unnummut ataatsimut aalajangersimasumik akilimmik akitsuut suliffeqarfinnut appasissunik akeqartitsisunut assersuutigalugu hotelinit qaffasissumik ininut akeqartitsisunit sakkortunerusumik eqquissasoq oqaatigaa. Taarsiullugu akitsuut suliffeqarfiup ukiumoortumik nalunaarutai malillugit unnuinernut tunngasunik aningaasartuutit 1 %-iattut akitsuutip akilersinneqartarnissaa siunnersuutigaat.

Ilanngullugu aaqjissuussinerup suliffeqarfiup qaammatit pingasukkaarlugit naatsorsuusiortarnissaanik piumaffiginnittoq, tamannalu ukiumoortumik naatsorsuusiortarnermut inatsimmik unioqqutitsinerusooq SKV-p oqaatigaa. Ilanngullugu 18-nik ukioqarnissamik ukiunut killigititap piviusumi ingerlanneqarsinnaannginnera, tamannalu eqqortumik takutitsinanilu nakkutigineqarsinnaasuunngitsoq oqaatigaat. Ilanngullugu kommunip isertitamik atuinerata sukannersumik aqunneqarnissaa kiisalu taakku ersarissuullutillu tamanit takuneqarsinnaasuunissaat kaammattuutigineqarpoq.

*Sapinngisamik pisariitsumik ersarissumillu allaffissornikkut ingerlatsinissaq qularnaarniarlugu inuit unnuisut malerassusaat akitsuummumut toqqammavissaatinneqarpoq. Akitsuut pissusissamisoortumik akikitsumik unnuisarfinni unnuinermut ataatsimut aningaasartuutinik annertunerulersitsissaaq. Assersuutigalugulu ukiumut nalunaarusiaq naapertorlugu unnuinermut tunngasunik isertitat 1 procentiinik akitsuusiinissamik siunnersuummumut tunngatillugu, aaqjiissutissatut siunnersuutigineqartoq pisariinnerussaaq, isertitammi suut “unnuinernut attuumasuunerannik” paasinninnermut piumasaqaateqartoqassammat. Akitsuutip annertussuserpiaa tamanut assigiimmat, akitsuut naapertuillu arnerusutut isigineqarpoq.*

Unnuinermut akitsuutip atulersinnera ukiumoortumik naatsorsuusiortarnermut inatsit naapertorlugu qaammatit pingasukkaarlugit naatsorsuusiortarnissamik piumasaqaammik malitseqanngilaq. Akileraarutit akitsuutillu allat nalunaarutigineqartarnerat assigalugu, tassani assersuutigalugu qaammatikkaartumik akileraarutinut A-nut akiliutit, taakku aamma piffissap ilaani naatsorsuusiortarnermik piumasaqaateqarfiunngillat. Taamaammat matumani ukiumoortumik naatsorsuusiortarneq pillugu inatsimmik unioqqutitsisoqanngilaq.

*Tusarniaarnerup kingorna inuit 18-it inorlugit ukiulinnut ilaatitsinnginneq atorunnaarpoq, nunatsinnili najugalinnut atuutilerluni. Nunatsinni najugallit akitsuummumut ilaatinneqannginnerat niueruteqartut ilaannut allaffissornikkut nammakkiissaaq. Tamannali iluanaarutit suliniutinut takornariat iluaqutserneqarnerannik ilaatinneqannginnerannut*

*siunertamut oqimaalutarneqassaaq.*

*Aaqqissuussinerup allaffissornikkut annikitsumik matussusernera eqqaassanngikkaanni, iluanaarutit kommuninut nakkassapput. Aningaasat taamaallaat takornariartitsinermik ineriartortitsinermut atorneqarnissaat, aningaasartuutillu akitsuummumut attuumasut kommunip naatsorsuutaani takuneqarsinnaanissaat piumasagaatigineqarpoq.*

### Greenland Airports

Greenland Airportsip siunnersuut taperserpaa, akitsuutillu ilanngarneqarnani kommuninut nuunneqartarnissaa, kommunillu akitsuummik siunertamut atuinissaat pingaaruteqartoq oqaatigalugu. Taamattaq oqaasertaliussani kukkusunik ilisimatitsivoq.

*Allaffissornermut ajunngitsorsiaq annikitsaq eqqaassanngikkaanni, aaqqissuussinermi iluanaarut kommuninut nakkartinneqartassaaq. Aningaasat taamaallaat takornariartitsinermik ineriartortitsinermut atorneqarnissaat, isertitallu aningaasartuutillu akitsuummumut tunngasut kommunip ukiumoortumik naatsorsuutaani takuneqarsinnaanissaat piumasagaataavoq. Oqaatigisat allanneqarnerani kukkunerit aaqqinneqarnerannik kinguneqarpoq.*

### Visit Greenland

Visit Greenland akileraartarnermut ingerlatsiviup qanoq inatsisip eqqortinneqarneranik pisariitsumik isumaginninnissaanik, suiffeqarfinnillu akitsuummumut ilaatinneqartunik suussusersinissaanik aarleqquteqarpoq. Ilanngullugu akitsuusersuinerumut aaqqissuussinermik atuutilersitsinermi nakkutilliisinnaajumalluni unnuisarfinnik tamanik nalunaarsuinissap pisariaqassasoq oqaatigineqarpoq. Taamattaq unnuisut amerlassuserpiaat eqqortumik ilisimaneqartinnagu inunnut ataasiakkaanut unnuisitsinernik pisoqartillugu. Taamatut pisoqartillugu kia unnuisut amerlassusaannik eqqortumik paasisutissinnissamut pisussaaffeqarnera erseqqissarneqartariaqarpoq. piffissami sivisunerusumi attartortitseqqitassatut atortunik attartortitsinermi kia akitsuummik akiliisussaanaera ersarluttoq Visit Greenlandip ilanngullugu oqaatigaa.

*Aallaavittut innuttaasut suliffeqarfyllu nunap inatsisaanik malinninniarnissaat tunngavissaatinneqarpoq. Akileraartarnermut Aqutsisoqarfik nakkutilliinermi suliaqarnini aqqutigalugit akileraarutininik akitsuutinillu inatsisinik atuuttunik sanioqqutsisut nassaariniartarpai, pisariaqartitsinermilu pineqartut akiligassinneqarnissaat inassutigisarlugi. Pisariitsumik eqaatsumillu atuutilersitsinissaq qulakkeerniarlugi, atuutilersitsinissaq ulloq 1. Januar 2026-mut aalajangerneqarpoq. Taamaaliornikkut aaqqissuussinermik pisariitsumik aqutsinissamut atortorissaarutit ikorfartuutaasussat ineriartortinnissaannut pisariaqartumik piffissaliisoqarpoq.*

*Siunnersuut naapertorlugi akitsuummik akiliisussaataitaasoq akitsuummik akiligassiinissamut, nalunaarsuinissamut akiliinissamullu akisussaavoq. Akitsuummumut akiliisussaataitaasoq*

*tassaavoq akiliisitsilluni unnuinernik neqerooruteqartoq. Pisumi taamaalilluni kingullertut attartortitsisoq, akiliisitsilluni piffissami sivikitsumi attartortitsisoq, akitsuummumut akiliisussaataaassaaq. Tamanna § 3, imm. 2-mut nassuiaatini erseqqissarneqarpoq.*

Unnuisarfiit amerlasuut Kalaallit Nunaanni pisortanik sullissisuupput, akiliinissamullu piffissap sivirusarneranik nalaataqartarlutik. Taamaammat unnuisarfiit aningaasanik tigatoriaannanik ajornartorsiulernissaat pinngitsoortinniarlugu pisortat akiliisarnissaannut killiliussap unnuinernilu akitsuummumut akiliinissamut killiliussap isumatusaartuunissaa qulakkeerneqartariaqarpoq.

*Tusarniaanerp kingorna nunatsinni najugallit akitsuummumut ilaatinneqarunnaarput. Pisortani sulisut tamatumani aamma ilaapput.*

Unnuinermut akitsuut takornariat pinngortitami unnuinerannut assingusumik aaqqissuussinertaqanngitsoq, siunertarineqanngitsumik takornariat akeqanngitsumik pinngortitami unnuisarnissaannik kaammattuissasoq, Visit Greenlandip oqaatigaa, tamannalu inuiaqatigiinni kalaallini iluarsartuussinissamik nammakkersuummik annertunerulersitsisinnaavoq. Taamaammat avataaneersunut tamanut, ullut 21-t inorlugit Kalaallit Nunaanniittunut, atuuttumik piffimmiinnermik akileraarusiisinnaaneq isumaliutigineqartariaqartoq Visit Greenlandip kaammattuutigaa.

*Oqaaseqaatit tupinik aalaakkaasunik nateqanngitsunik ilaalersitsinissamut kinguneqarput. Naak pinngortitami assersuutigalugu nammineq tuperni unnuinerit unnuinermut akitsuummumut ilaatinneqanngikkaluartut, taamaattoq akitsuut kisimi peqqutaalluni soorlu hotelini illuaqqaniluunniit unnuinerit nammineq tuperni unnuinernik taarsernissaanut pilerilersitsisinnaanera ilimanaateqanngitsutut isigineqarpoq. Nunamut maanga takornariatut tikeraarnermut timmisartumut, umiarsuarnullu billetinut kiisalu ineqarnermut nerisaqarnermullu aningaasartuutitut tamarmiusunut sanilliullugu, akitsuutissatut siunnersuutigineqartoq annikitsuinnaasutut isigineqarpoq.*

#### Kommuneqarfik Sermersooq

Kommuneqarfik Sermersuup namminersorlutik inuussutissarsiortut allaffissornikkut nammakkersorneqarnerat eqqarsaatigalugu, meeqqat inuusuttullu 18-t inorlugit ukiullit akitsuummumut ilaatinneqannginnerisa peerneqarnissaa siunnersuutigaa.

*Oqaaseqaatit meeqqanik inuusuttunillu 18-it inorlugit ukiulinnik ilaatitsinnginneq atorunnaarsinneqarpoq. Nunatsinnili najugalinnut atuutilerluni. Ilaatitsinnginneq neqerooruteqartunut allaffissornikkut nammakkersuutaasussaavoq. Allaffissornikkulli nammakkersuut eqimattanut toqqakkanut akitsuummumut akiliisussaataaanginnerannut sanilliunneqassaaq.*

Akitsuut allaffissornermi aningaasartuutitut naleqqunnissaa qularnaarniarlugu, akitsuutip 20

kr.-nit 40 kr.-nut qaffanneqarnissaa Kommuneqarfik Sermersuup siunnersuutigaa.

*Tusarniaanerup kingorna akitsuut 20 kr.-mit 30 kr.-mut qaffanneqarpoq. Unnuinermi akitsuut illuatungaani naleqquttumik iluanaaruteqarnissaq, aappatigullu akitsuummik nutaamik takornariartitsinermik suliaqartunut allanngoriartortunut ukiunilu makkunani ineriartortunut isiginnilluni aalajangersagaavoq. Inuusuttut 18-t inorlugit ukiullit ilaatinneqannginnerannut siunnersuummut tunngatillugu tamanna pillugu siusinnerusukkut allanneqartut innersuussutigineqarput.*

Nunap immikkoortuinik piffinnillu suna pineqarnerseq kiisalu unnuinermi akitsuutit kommunip ilaanit aalajangersimasumeersut, kommunip ilaani allami atorneqarsinnaanersut Kommuneqarfik Sermersuup apeqqutigaa.

*Piffik taamaallaat piffimmuut aalajangersimasumut tunngatinneqarpoq, soorlu nunaqarfik, nunallu immikkoortuanut tunngatillugu ataatsikkut piffiit arlallit pineqarput. Siunnersuutikkut kommunit suliniutinik nammineerlutik pingaarnersiuisinnaatinneqarput, tassani aningaasat assersuutigalugu Nuummeersut, kommunip ilaani allani suliniutinut atorneqarsinnaanerat ilanngullugu.*

#### Arctic Circle Business

Ingerlatsisut arlallit akitsuut pitsaasuutippaat, tassani aningaasat takornariartitsinerup siuarsarneranut atorneqarnissaat unnuisarfinnilu namminersorlutik inuussutissarsiortut taparserneqarnerannut atorneqarsinnaanerat tunngavissaatillugu. Aningaasat ersarissumik piffinnilu inuiaqatigiinni malunnaatilimmik atorneqarnissaat pingaaruteqarpoq. Akitsuutilli allaffissornikkut immikkut annertuumik nammakkiinissaa aamma aarleqqutigineqarpoq. Japanip “Sayonara”-mik aqqissuussinera isumassarsiorfiusinnaavoq. Aqqissuussinermi tassani takornariat mittarfimmit aallalernerminni akitsuummik akiliisarput, tassanilu hotelini, Airbnb-mi, tuperni il.il. najugaqarnerminni paasissutissat katersorneqarlutik qitiusumut ingerlateqqinneqartarput. Ingerlatsisut arlallit akitsuummik minnerpaamik akitsuutip annertoqataanik aningaasartuutinik matussusiiniarlutik imminnut akiliisitsinissat Arctic Circle Business ilimagaa.

*Akitsuummit aningaasat isertinneqartut siunnersuummi § 8 malillugu kommuninut agguanneqartussaapput, taakkulu unnuinermi akitsuummit isertitat taamaallaat piffinni nunallu immikkoortuani takornariartitsinermik ineriartortitsinermut aningaasat atorsinnaavaat. Piffimmik aallaaveqarnerup aningaasat kommunalbestyrelsip aalajangernera malillugu naapertuunnerpaamik atorneqarnissaat qularnaassavaa.*

*Akitsuusersueriaaseq suliffeqarfinnut sapinngisamik pisariinnerpaamik aqqissuunniarneqarpoq, peqatigisaanimmi suliffeqarfiit isertitaasa akitsuutillu akilerneqarnerata akornanni ataqatigiittoqarnissaata attanneqarnissaa naapertuunnerpaatut isigineqarmat. Tusarniaanermut akissummi akitsuutip angalasup unnuineri*

*toqqammavigalugit mittarfimmi aallarfinnit akilersinneqarnissaa siunnersuutigineqartumi, taamatut aaqqissuussinerup unnuiffiit tamarmik ullaat tamaasa qarasaasiakkut nalunaaruteqartarnermik aaqqissuussamat nalunaartarnissaat isiginiarneqarpassinngilaq, soorluttaaq ilaatigut mittarfinni aallarfinni umiarsualivinnilu il.il. tamani akiliisitsiarfinnik pilersitsisoqarnissaata tunngavissaatinneqarnera eqqarsaatigineqarpassinngitsoq. Angalasussat amerlassusissaattut ilimagineqartut eqqarsaatigalugit, taamatut aaqqiineq unnuisarfinnik oqartussanillu annertuumik nammakkersuissaaq. Akitsuusersueriaatsit siunnersuutigineqartoq unnuisarfinnik annertunermik nammakkersuissaaq, qarasaasiakkulli nalunaaruteqarnissamat periarfissat pilersinneqarnissaat pilersaarutigineqarmat, pissutsit naapertorlugit nammakkersuutigineqartut sapinngisamik annertunerpaamik killilerniarneqarnissaat naatsorsuutigineqarpoq.*

### Air Greenland A/S

Air Greenlandip inummut ataatsimut unnuinermi ataatsimi unnuinermut akitsuummik 20 kr.-nik atulersitsisoqarnissaa tapersorsorpaq, taamaattoq akitsuut kajumissutsimut pitsaanngitsumik sunnuteqartutut nalilernerparpat, akitsuutip nunap immikkoortuini nalimmassarsinnaaneranik periarfissap ilanngunneqarnissaa sillimmartaarutigalugu. Tamatuma saniatigut nammineq piumassuserinngisamik unnuisoqartillugu, soorlu ingerlariaqqissinnaannginnerni, unnuinermi ataatsimi 20 kr.-nik akitsuummik akiliisitsisoqartariaqanngitsoq Air Greenland isumaqarpoq, tamannami allaffissornerunermik taamaallaat kinguneqassamat isertitaqarnerulissutaanngitsumik. Inatsimmi takornariatitsinermik ineriartortitsineq piffimmilu takornariat amerlineranni pitsaanngitsunik kinguneqaatit annikillisarneqarnissaat qanoq paasineqassanersoq pillugu malitassianik ersarissunik peqarnissaa, Air Greenlandip kaammattuutigaa.

*Tunngaviusumik inatsimmi § 43-mi akitsuutip akitsuummut inatsimmi aalajangersarneqarnissaa kaammattuutigineqarpoq, akitsuutillu piffimmi nunallu immikkoortuani takornariatitsinermik ineriartortitsinermut kingunerisassai siumut takorlooruminaammata, akitsuutip nalimmassarneqarsinnaaneranut periarfissap ilanngullugu inatsimmi allanneqarnissaa eqqortutut isigineqanngilaq. Naalakkersuisulli ukiuni aggersuni takornariatitsinermi ineriartorneq malinnaaffigissavaat, taamatullu aamma inatsisip nalimmassarnissaata pisariaqarumaarnera.*

*Ingerlariaqqissinnaannginnermi akitsuummik akiliisitsisannginnissamik siunnersuut § 3, imm. 1, nr. 3-tut ilanngunneqarpoq.*

*Siuliani taaneqareersutut akitsuummit aningaasat isertut siunnersuummi § 8 malillugu kommuninut agguanneqassapput, taakkulu unnuinermut akitsuummit isertitat piffimmi nunallu immikkoortuani takornariatitsinermik ineriartortitsinermut taamaallaat atorsinnaavaat. Piffimmik aallaaveqarnerup aningaasat kommunalbestyrelsip aalajangerneri malillugit naapertuunnerpaamik atorneqarnissaat qularnaassavaa.*



Hotel Hans Egede (HHE)

Akitsuut ukiunik killernagu akilersinneqartassasoq HHE-p siunnersuutigaa, taamaaliornerummi pisariaqanngitsumik pisarissersuutaasumillu nakkutilliinissaq malitsigissammagu. § 3, imm. 2-mi akiliinissamik nalunaaruteqarnissamillu pisussaaffik unnuiffiup pisussaaffigigaa ersarissarneqartariaqarpoq. Taamattaaq akitsuutip aningaasarsianik akileraarutinillu akiliinertulli qaammatikkaartumik akilernerqartarnissaa HHE-p aamma siunnersuutigaa. Tamatuma saniatigut akitsuummuk akiliivallaarutit kreditkontumut ikineqartarnissaat ukiullu tamaasa ulloq 31. december utertillugit akilernerqartarnissaat siunnersuutigineqarpoq. Kommunit qanoq annertutigisumik allaffissornikkut aningaasartuutitut atuisinnaanerannut procentimik annertunerpaaffiliisoqartariaqarpoq, soorluttaaq Naalakkersuisut qanoq annertutigisumik malittarisassanik ersarinnerisunik aalajangersaasinnaanerat ersarissarneqartariaqarpoq.

*Oqaaseqaatit inunnut 18-it inorlugit ukiulinnut atuutitsinnginnermik atorunnaarsitsinermik kinguneqarput.*

*Akitsuummik akiliisussaatitaasoq attartortitsisoq assersuutigalugu ingerlatsiviup attartortitseqqinnissaa siunertaralugu angalatitseqatigiiffimmuk sivirusumik attartornissamik isumaqatigiissuteqartillugu, akitsuummik akiliisussaatitaasup attartortitsinermi akiliisitsillunilu akitsuummik piffissami sivikitsumi attartortitsinertulli attartortitsinermut akiliisaaq.*

*Akitsuutip qaammatit pingasukkaarlugit akilersinneqartarnissaata siunnersuutigineranut, ilaatigut akitsuutip killilimmik iluanaarutinut sunniuteqarnissaa ilaatigullu ingerlatsisut assigiinngitsorpassuunerat patsisaavoq.*

*Akitsuummuk akiliivallaarutinut kreditkontumik siunnersuut akileraartarnermut ingerlatsiviup akitsuummik ingerlatsineranut aningaasartuuteqarnerulersitsissaaq, taamaammallu siunnersuut ilanngunneqanngilaq.*

*Taamattaaq kommunit aaqqissuussinermik allaffissornikkut qanoq annertutigisumik atuisinnaanerannut killiliussassatut siunnersuut ilanngunneqanngilaq. Kommunit pisortat sipaarniartuunissaannik periutsimik nalinginnaasumik atuuttumik toqqammaveqarlutik aaqqissuussinermik sapinngisamik pisariinnerpaamik ingerlatsiniarnissaat tunngavissaatinneqarpoq. Matumani aaqqissuussineq nutaaq pineqarpoq, tassanilu misilittakkat erseqqinnerusumik malittarisassiornissamik pisariaqartitsinermik pissarsiffiussapput. Taamaammallu § 9 annertunerusumik erseqqissaavigineqanngilaq.*

Kommune Kujalleq

§ 3, imm. 2-p paasinerlunneqarsinnaanera Kommune Kujalliup maluginiarpa.

*Aalajangersakkamut nassuiaatit erseqqissarneqarput.*

Innovation South Greenland (ISG)

§ 1-imi “Tupermi unnuisarfik aalaakkaasumik natilik” “Toqqit akiliisitsilluni”-mik taarserneqarnissaa ISG-p siunnersuutigaa.

*Oqaaseqaatit aalajangersakkamik ima allannguineramik kinguneqarput, tuperni akiliilluni unnuinerit ilaatinneqartunngorlutik.*

Unnuisarfiup angalatitseqatigiiffinnut il.il. attartortitsinerani, angalatitseqatigiiffik pisisumut unnuinermik tuniseqqinnerani kia akitsuummumut akiliisussaataanera, ISG-p apeqquutigaa.

*Pisuni taamaattuni unnuisarfik angalatitseqatigiiffimmumut attartortitsisoq akitsuummumut akiliisussaataaavoq. Tamanna § 3, imm. 2-mi nassuiaatini ersarissarneqarpoq.*

Akitsuut inunnut kalaallinut nunanillu allaneersunut atuunnersoq, ISG-p apeqquutigaa. Taamaappallu ulluni 21-ni killiliussap piffimmi ataatsimi ullunit 21-nit sivisunerusumik unnuisunut akikilliliissummik taarserneqarnissaa siunnersuutigalugu.

*Oqaaseqaatit nunatsinni najugalinnut atuutitsinnginnermik kinguneqarput. Inuit unnuiffimmi aalajangersimasumi ullut 21-t sinnerlugit unnuigaangata, tamanna suliassanik suliaqarnermik patsiseqartanera siunnersuummi tunngavissaatinneqarpoq. Taamatut sivisunerusumik sulilluni unnuisarnerit akitsuusernissaat siunnersuutip siunertarinngilaa.*

Suliffeqarfiit minnerusut eqqarsaatigalugit akitsuut ukiumut marloriarluni taamaallaat akilerneqartassasoq, ISG-p siunnersuutigaa.

*Akitsuutip qaammatit pingasukkaarlugit akilerneqartarnissaa ilaatigut akitsuutip killilimmik iluanaarutaasusaanera, ilaatigullu ingerlatsisut assigiinngitsorujussuunerannik patsiseqarpoq.*

Akitsuummik akiliisussaataasup aatsaat 300 kr.-t sinnerlugit akitsuummik akiliivallaarsimanerani, utertitsivigineqartarnissaa naapertuutinngitsumik atugassaqaarnertut ISG-p isigaa.

*Killiliussaq akitsuummik aaqqissuussinerup atuutsinneqarnerani aningaasartuutini annikitsuutitsinissamik siunertaqarpoq. Aningaasanik ikittunik taaneqartunik utertitsinermit allaffisornikkut aningaasartuutit tamarmiusut taamaalillutik aningaasanit utertitassanit amerlanerusinnaanerat naliliutaavoq.*

Unnuisarfiit tamarmik kommuninut agguaassinerni ilanngunneqartariaqartut ISG isumaqarpoq.

*Unnuisarfiit akitsuummik akiliisussaataasut amerlassusaat naapertorlugit kommunit iluanaarutissinneqartarnissaannik kinguneqarpoq. Taamatut agguaasseriaatsimi unnuinerit akitsuuserneqartussaataasut amerlassusiisa ilanngunneqannginnissaat naapertuutinngissorineqarpoq.*

Akitsuummik Akileraartarnermut Aqutsisoqarfimmut akiliineq kommuninullu akiliineq sivisuallaartoq ISG isumaqarpoq.

*Akitsuummit iluanaarutissatut ilimagineqartoq inatsisillu allaffissornikkut namminersorlutik oqartussanut kommuninullu kingunerisaanik annikilliliinissaq siunnersuutigineqartumut naapertuuppoq.*

### Hotel Sisimiut

Periuseq siunniunneqartoq inuiaqatigiinnik kalaallinik nanertuisuussaaq, akitsuummi unnuinernik tamanik eqquisussaavoq. Tamatuma namminersorlutik oqartussat kommunillu kiisalu ilinniarfeqarfiit il.il. aamma akitsuummik nunap immikkoortuini takornariartitsinermik ineriartortitsinermut ingerlasussanik akiliisinneqarnissaat malitsigissavaa. Taarsiullugu assersuutigalugu japanimiut Sayonara tax-imik akitsuutaannut assingusumik periuseqarnissaq isumaliutigineqarsinnaavoq. Akitsuut taanna angalasut tamarmik Japanimit aallarneranni akilersinneqartarpoq. Periutsittaaq Kalaallit Nunaanni inuiaqatigiit aningaasartuutunik nammakkorsorneqarnissaat pinngitsoortissavaa, unnuisummi Kalaallit Nunaanni najugaqartut unnuinermi akitsuummik akiliisassanngillat.

Periusissatut siunnersuutigineqartoq toqqarneqassappat makku isumaliutigineqassapput: Pisortat akiliinissamut killiliussaasa unnuiffiillu unnuinermi akitsuummut akiliinissaannut killiliussat isumatusaartumik nikinganissaat pingaartorujussuovoq. Kina unnuisut eqqortumik nalunaarutiginissaannut pisussaaffeqarpa? § 3, imm. 2-mi taaneqartumi piffissami sivisunerusumi unnuinermut atortunik attartortitseqqinnermi kina akitsuummik akiliisussaataitanersoq ersarinngilaq. Unnuinermut akitsuutikkut pinngortitami unnuinermik ilaatitsinngitsumi ingammik takornariat akitsuutitaqanngitsumik pinngortitami unnuisarnissaannik siunertarineqanngitsumik kaammattoriataarsinnaavagut. Akitsuut qaffasippoq, unnuisarfirmimmi attartukkami agguaqatigiissillugu unnuisarneq nunanit sanilliussinermi kisitsimmit pissarsiffigineqartumit qaffasinnerummat. Kalaallit Nunaat angalaffigissallugu akisoreeqaaq, takornarianut maanilu najugaqartunut. Annertussuseq naapertuuttoq 1 Europ – tassa 1 US dollarip missaaniippoq.

*Oqaaseqaatit nunatsinni najugalinnut atuutitsinnginnermik kinguneqarput. Akitsuutip angalasup unnuineri toqqammavigalugit mittarfimmi aallarfirmiit akilersinneqarnissaa siunnersuutigineqartumi, taamatut aaqqissuussinerup unnuiffiit tamarmik ullaat tamaasa qarasaasiakkut nalunaaruteqartarnermik aaqqissuussamut nalunaartarnissaat isiginiarneqarpassinngilaq, soorlutaaq ilaatigut mittarfinni aallarfinni umiarsualivinnilu il.il. tamani akiliisitsiarfinnik pilersitsisoqarnissaata tunngavissaatinneqarnera eqqarsaatigineqarpassinngitsoq. Angalasussat amerlassusissaattut ilimagineqartut eqqarsaatigalugit, taamatut aaqqiineq unnuisarfinnik oqartussanillu annertuumik nammakkorsuissaaq.*

*Attartortitsisoq akitsuummik akiliisussaataitaasoq unnuinerit amerlassusaannik eqqortumik nalunaaruteqartussaataitaavoq.*

*§ 3, imm. 2-mut nassuiaatini unnuisarfirmik angalatitseqatigiiffimmut attartortitsisoq akitsuummumut akiliisussaataaasoq erseqqissarneqarpoq.*

*Oqaaseqaatit aalajangersakkamik ima allannguinermik kinguneqarput, tuperni akiliilluni unnuinerit ilaatinneqartunngorlutik. Akitsuut angalasut pinngortitami nammineq tuperni, sheltersini assigisaanilu unnuinissaanut pilerinerulersitsisinnaasoq eqqorpoq. Akitsuutip annertussusaa taamatut unnuinernik aaqqissuussinernut sanilliullugu ilorrisimaartartuunnginnerata angalasut pissuserisaannik annertuumik allannguisanngitsaq naliliutaavoq. Tamatuma saniatigut siusinnerusukkut tamanna pillugu allanneqartut innersuussutigineqarput.*

*Kalaallit Nunanut nunaata takornariarfittut ineriartornera eqqarsaatigalugu nunanut allanut sanilliullugu akitsuut naapertuuttumik annertussuseqartoq naliliutaavoq.*

Inuussutissarsiornermut, Niuernermut, Aatsitassanut, Inatsisit atuutsinneqarnerannut Naligiissitaanermullu Naalakkersuisoqarfik

*18-inik ukiulinnut ukiutigut killiliusaaq peerneqassasoq siunnersuutigineqarpoq. § 8, imm. 4-mi aalajangersagaq sukumiivallaarsorineqarpoq.*

*Oqaaseqaatit inunnut 18-it inorlugit ukiulinnut atuutitsinnginnermik atorunnaarsitsinermik kinguneqarput.*

*Siunnersuummi § 8, imm. 4-mut sinaakkutit akitsuutip takornariartitsinermut siunertanut atorneqarnissaa, akitsuummillu takornariat akornanni unnuiffinnilu akitsuummik akiliisussaataasuni paasinnilluartitseqataanissaanut peqataaqataassapput. Siammasinnerusumik oqaasertaliineq tamatuminnga nungutitseratarsinnaavoq.*